

Auglýsing þessi er sett samkvæmt ákvæðum 5. gr. laga nr. 45/1987, um staðgreiðslu opinberra gjalda, og 116. gr. laga nr. 75/1981, um tekjuskatt og eignarskatt. Gildir hún við staðgreiðslu frá og með 1. júní 1996.

Reykjavík 12. júní 1996.

Snorri Olsen ríkisskattstjóri.

REGLUGERÐ

**um breytingu á reglugerð nr. 593/1993 um málsmeðferð og valdsvið
eftirlitsstofnunar EFTA á sviði samkeppni samkvæmt
samningum um Evrópska efnahagssvæðið.**

1. gr.

Á eftir 1. gr. bætist við ný grein, 1. gr. a, sem orðast svo:

Á grundvelli ákvörðunar sameiginlegu EES-nefndarinnar nr. 3/94 frá 8. febrúar 1994 skal eftirtalin EB-gerð öðlast gildi hér á landi, með þeim breytingum og viðbótum sem leiðir af bókun 21 (um framkvæmd samkeppnisreglna sem gilda um fyrirtæki), bókun 1 (um altæka aðlögun) og öðrum ákvæðum samningsins:

- reglugerð ráðsins (EBE) nr. 2410/92 frá 23. júlí 1992 um breytingu á reglugerð ráðsins (EBE) nr. 3975/87 sem setur reglur um beitingu samkeppnisreglna gagnvart fyrirtækjum á sviði flutninga í lofti.

2. gr.

Reglugerð þessi, sem sett er samkvæmt heimild í 48. gr. samkeppnislaga nr. 8/1993, öðlast þegar gildi.

Ákvörðun sameiginlegu EES-nefndarinnar og EB-gerðin, sem fela í sér breytingu á bókun 21 við EES-samninginn og snerta framkvæmd 53.-54. gr. hans, eru birtar í EES-viðbæti við Stjórnartíðindi EB, nr. 1, 30.3.1994, bls. 5 (ákvörðunin), og nr. 34, 15.9.1994, bls. 1 (EB-gerðin).

Viðskiptaráðuneytinu, 14. júní 1996.

Finnur Ingólfsson.

Jón Ögmundur Þormóðsson.

REGLUGERÐ

fyrir Lífeyrissjóð Tannlæknafélags Íslands.

1. gr.

Nafn og heimili.

Sjóðurinn heitir Lífeyrissjóður Tannlæknafélags Íslands. Heimili hans og varnarþing er í Reykjavík.

2. gr.

Hlutverk sjóðsins.

Hlutverk sjóðsins er að ávaxta iðgjöld sjóðfélaga og tryggja þeim og erfingjum þeirra lífeyri samkvæmt samþykktum sjóðsins.

3. gr.

Sjóðfélagar.

Sjóðfélagar geta orðið starfandi tannlæknar og makar þeirra, sem ekki er að lögum skylt að vera í öðrum lífeyrissjóði. Þeim starfandi tannlæknum, sem skylt er að vera í öðrum lífeyrissjóði, er þó heimilt að vera einnig í þessum sjóði, ef þeir hafa tekjur af tannlækningum, sem þeir greiða ekki iðgjöld af í hinn sjóðinn.

Þeir sem eiga eignir í sjóðnum teljast sjóðfélagar.

4. gr.

Iðgjöld til sjóðsins.

Lágmarksiðgjald sjóðfélaga fer eftir ákvæðum laga nr. 55/1980 um starfskjör launafólks og skyldutryggingu lífeyrisréttinda og reglugerð settri samkvæmt þeim lögum.

Sjóðfélaga, sem vinnur hlutastarf í tannlækningum eða greiðir í annan lífeyrissjóð (sbr. 3. gr.), er heimilt að greiða hálf tðgjald í sjóðinn. Heimilt er sjóðfélögum að greiða meira en lágmarksiðgjald. Skylt er sjóðfélögum að greiða iðgjöldin á réttum gjalddögum, hvort sem krafa hefur borist frá sjóðnum eða ekki.

Iðgjöldin greiðast ársfjórðungslega í febrúar, maí, ágúst og nóvember eigi síðar en 15. hvers þessara mánaða. Sjóðfélagar bera ekki ábyrgð á sjóðnum að öðru leyti en með því að greiða iðgjald sitt á réttum tíma.

Sjóðfélagi, sem er í vanskilum um meira en eina iðgjaldagreiðslu á ekki rétt á lánnum úr sjóðnum. Réttindi þessi koma í gildi á ný, þegar sjóðfélaginn hefur greitt að fullu vangoldin iðgjöld með lögboðnum dráttarvöxtum.

5. gr.

Stjórn sjóðsins og hlutverk hennar.

Aðalfund skal halda á tímabilinu janúar til mars ár hvert. Félagsfundur getur þó breytt aðalfundartíma, ef sérstaklega stendur á. Til aðalfundar skal boða með þriggja vikna fyrirvara. Fundurinn er lögmaður sé löglega til hans boðað.

Stjórn sjóðsins skipa fimm menn. Þeir eru kosnir á aðalfundi sjóðsins til þriggja ára. Stjórnina skipa formaður, ritari, gjaldkeri og 2 meðstjórnendur og skiptir hún sjálf með sér verkum. Kjósa skal endurskoðanda úr hópi sjóðfélaga til eins árs.

Formaður boðar til stjórnarfundar og skal halda fund ef einhver stjórnarmanna krefst þess.

Stjórn sjóðsins skal sjá um rekstur hans og reikningshald samkvæmt reglugerð þessari eða fela öðrum það. Hún skal halda gjörðabók og skrá í hana allar samþykktir. Til þess að samþykkt sé lögleg þarf meirihluti stjórnarmeðlima að greiða henni atkvæði. Til þess að skuldbinda sjóðinn þarf undirskrift þriggja stjórnarmanna.

Rétt til atkvæðagreiðslu og kjörgengis á fundum sjóðsins hafa allir virkir sjóðfélagar. Virkur sjóðfélagi telst sá sem skuldar færri en fjórar iðgjaldagreiðslur. Á aðalfundi sjóðsins getur virkur sjóðfélagi neytt atkvæðisréttar síns bréflaga með atkvæðaseðli sem sendur er út með aðalfundarboði. Slík atkvæðagreiðsla tekur aðeins til stjórnarkjörs og reglugerðar-breytinga.

6. gr.

Ávöxtun á fé sjóðsins.

Stjórn sjóðsins sér um ávöxtun á fé hans eða felur öðrum það. Sjóðurinn skal ávaxtaður á eftirfarandi hátt:

- 1) Í ríkisskuldabréfum og skuldabréfum tryggðum með ábyrgð ríkissjóðs.
- 2) Í bönkum og sparisjóðum.
- 3) Í lánum tryggðum með veði í fasteignum, þó ekki yfir 50% af brunabótamati húsa og 75% af fasteignamati lóða. Ef brunabótamat er ekki fyrir hendi, eða það telst ófullnægjandi viðmiðun, skal miðað við matsverð, sem löggiltur fasteignasali eða annar sérfróður aðili framkvæmir.
- 4) Í skuldabréfum sveitarfélaga með trausta rekstrarlega afkomu og fjárhagslega stöðu.
- 5) Í traustum verðbréfum sem skráð eru á Verðbréfaþingi Íslands eða á Opna tilboðsmarkaðinum.
- 6) Í traustum erlendum verðbréfum sem skráð eru á opinberum verðbréfamörkuðum í aðildarríkjum Efnahags- og framfarastofnunarinnar (OECD). Þó má aldrei meira en 30% af eignum sjóðsins vera undir liðum 5 og 6.

Ekki er heimilt að fjárfesta samkvæmt liðum 5 og 6 án samþykkis stjórnar lífeyris-sjóðsins.

7. gr.

Bókhald, ávöxtun, endurskoðun og tryggingar.

Fé það sem lagt er inn í nafni sjóðfélaga, skal vera séreign hans. Auk þess skal færa til eigna hjá hverjum sjóðfélaga þær tekjur af vöxtum og verðbótum sem sjóðnum áskotnast vegna eignar hans í sjóðnum.

Hreinar tekjur sjóðsins skiptast milli sjóðfélaga í hlutfalli við eign hvers um sig og færast árlega á sérreikning þeirra.

Af bókhaldi sjóðsins skal jafnan vera hægt að sjá hvað hver einstakur hefur lagt í sjóðinn og fengið borgað úr honum og hver inneign hans er.

Rekstrarkostnað sjóðsins skal greiða af vaxtatekjum hans.

Reikningsár sjóðsins er almanaksárið. Reikningar sjóðsins skulu lagðir fram á aðalfundi hans undirritaðir af stjórninni og tveimur endurskoðendum. Annar endurskoðandinn skal vera löggiltur en hinn úr hópi sjóðfélaga. Löggilti endurskoðandinn skal ráðinn af stjórn.

Stjórn sjóðsins er heimilt að fenginni skriflegri beiðni sjóðfélaga að draga af inn-greiddum iðgjöldum hans upphæð sem svarar til iðgjalda vegna líf-, lífeyris-, eða heilsu-tryggingar hjá viðurkenndu tryggingafélagi. Sjóðfélaga ber þó ávallt að greiða óskert lágmarksíðgjald til sjóðsins.

8. gr.

Greiðslur úr sjóðnum.

- 1) Þegar sjóðfélagi er 65 ára á hann rétt á að fá greidda inneign sína í sjóðnum og skal sú greiðsla fara fram með jöfnum greiðslum á eigi skemmri tíma en 5 árum. Heimilt er sjóðfélaga, sem náð hefur 65 ára aldri, að fresta að taka út inneign sína um eitt ár í senn, og er honum jafnframt heimilt en ekki skylt að greiða áfram iðgjöld í sjóðinn. Engu að síður skal greiðslum úr sjóðnum dreift á minnst 5 ár. Sama rétt má stjórn sjóðsins veita sjóðfélaga sem verður að hætta störfum fyrir 65 ára aldur vegna heilsubrests.

- 2) Þegar sjóðfélagi deyr, skal inneign hans ganga í dánarbú hans á fimm árum með jöfnum greiðslum og skiptast samkvæmt erfðafjárlægum.
- 3) Ef sjóðfélagi gerist vegna atvinnubreytingar sjóðfélagi í öðrum lífeyrissjóði og fullnægir þar með lagaskyldu um iðgjaldagreiðslu, er sjóðstjórninni heimilt að flytja inneign hans í þann sjóð. Það er skilyrði fyrir flutningnum, að gagnkvæmur samningur sé gerður milli sjóðanna um réttindaflutning.
- 4) Öryrkjar sem njóta örorkulífeyris þegar reglugerð þessi gengur í gildi, njóta áfram lífeyris samkvæmt eldri reglum. Sama gildir um dánarbætur.

9. gr.

Bann við framsali og veðsetningu.

Óheimilt er að framselja eða veðsetja inneign í sjóði þessum hvort heldur er í heild eða að hluta svo sem einstakar útborganir.

10. gr.

Gerðardómur.

Ef ágreiningur er milli sjóðstjórnar og sjóðfélaga út af reglugerð þessari eða ákvörðun sjóðstjórnar, má leggja ágreiningsatriðin fyrir þriggja manna gerðardóm. Hvor aðili nefnir til einn mann. Dómstjórinn í Reykjavík tilnefnir oddamann.

11. gr.

Breytingar á reglugerð.

Til breytinga á reglugerð þessari þarf 2/3 greiddra atkvæða sjóðfélaga á aðalfundi sjóðsins. Geta skal um breytingar í aðalfundarboði.

Með tilvísun til laga nr. 55/1980 staðfestist reglugerð þessi hér með.

Fjármálaráðuneytinu, 12. júní 1996.

F. h. r.

Áslaug Guðjónsdóttir.

Ragnheiður Snorradóttir.

REGLUGERÐ

um framkvæmd námskeiða fyrir vélgæslumenn (VM).

1. gr.

Rétt til þess að sækja námskeið í vélgæslufræðum fyrir vélgæslumenn á skipum allt að 20 rúmlestum með aðalvél minni en 221 kw. hafa þeir sem náð hafa 18 ára aldri.

2. gr.

Vélskóli Íslands hefur yfirumsjón með framkvæmd námskeiðanna og sér um samningu námsefnis í samræmi við innihald þeirra. Um útgáfu námsefnisins skal skólinn hafa samráð við hagsmunaaðila.